

四庫全書

集部

欽定四庫全書

五百家播芳大全文粹卷三十五

宋 魏齊賢

葉 棻同輯

謝啓

薦舉

謝監司薦舉啓

李仁甫

備員下邑曾未淹時託庇崇墉僅能逃譴敢期收錄獲

預薦敎自惟愚不肖之微軀猥當賤有司之劇任德惠
不足以化俗威令不足以肅姦適民物凋弊之時承紀
綱隳廢之後師徒造境罄無一日之資糧詞牒盈庭曾
是積年之冤抑方虞戎兵芻粟之責豈特簿書獄訟之
煩殆寢食之靡遑窮朝昏而不給懼百姓疾苦之未究
寧一身勤瘁之敢辭屬使節之俯臨擁輿師而少駐治
狀甚拙固已熟於聽聞才術非長亦莫逃於鑒察誤蒙
褒拂深切兢慙此蓋伏遇某官恕以及人忠於報國念

小智之自竭粗盡疲驚苟片善之可觀必加甄採致茲
孱陋亦免棄捐某敢不增激懦衷益堅素守上廣寬仁
之澤普及細民務收歲月之功罔干虛譽第無慙於內
省庶不辱於已知

謝監司薦舉啓

周行可

特預薦章俾升幕佐名非實副感與愧并嘗聞人雖病
於難知士亦羞於詭遇謂能脩其身則天且不廢苟自
信其道則世誰可輕如玉韞匱以何沽况珠在淵而必

媚所期非速爲趨每高或片言而推其氣識之優或一見而許以公侯之貴蓋去就之有守在賢否以甚明故時無滯才朝盡公舉惜乎風流既息古義寢衰蔽是非之實以愛憎櫻榮辱之情於得喪霄漢扶持之速跬足三公塵埃排擯之餘蒼顏斗粟至使名身兩役物我更持冰炭裝懷夜忘卧夢風波駭目日起志憂甚者巧希合於情先開險深於迹外邯鄲善步壽陵爭襲其趨螭螂息陰黃雀已窺其後笑窮通之有序矜富貴於易媒千里坐

期一跌隨廢如某者生而寡見動則數奇起時雖願於激揚學道每傷其遲後四百年之傳序世出聞人三千帙之故書家無別橐引矚簪裾之列來游翰墨之場見舟即操往焉無懼取蜩猶掇顧者皆驚兩綴賢書再丁家禍收餘生之殘稿擢一第於淹回尚憐垂翅之窮猶有搶榆之決然而上京雄觀羣俊並驅談落落以相高意僂僂而欲舉自惟瑣賤分取棄沉何期舊學之拙迂忽誤近臣之論薦職之鄉校編以儒林脫敲扑之喧囂屏

簿書之倥傯弦歌終日酣味六經少釋爲賓之憂終懷
浮食之愧加以服大人之餘誨感末路之多虞益知勢
利之易汙未見紛華之可樂不肯碌碌與時太踈何爲
區區顧影自笑每欲玩林泉而伏老櫛杞菊以茹饑放
浪形骸優游歲月向子平之家事猶累素心陶靖節之
吾廬但馳去夢遲遲斯返忽忽未遑愈深必退之思無
復儻來之望敢希孤宦輒動上官憫其短步之勞挈以
循階而進此蓋伏遇某官至仁兼愛大雅不遺以長

取人由恕及物傳鳴鳩之羽翮文斷木以青黃必使接
天衢之游庶幾成宗廟之器量能非稱荷賜過優某敢
不勵終身歸潔之心慕古人特立之義老將至耳未甘
四十而無聞學恐失之尤愧寸陰之可惜誓堅素守上
答明知

謝監司薦舉啓

王元長

觀其爲主進身者豈易於依人舉爾所知爲上者亦難
於與物蓋非義不合以道泛觀可否在我而不蔽其心

窮達自天而一尸諸命逮於名實不立風俗寢衰視聽
悠悠不斷於是非之際情僞擾擾必爭於得喪之途至
有迂風多摧附火先熱蘭子之劍適著躍空東郭之筭不
知濫吹雖出愛憎之素昧卒成利害之相攻其或巧言
如流素書盈束幸韓荊州之一見借郭有道之片言高
談則自謂退藏大致則求爲容悅淒酸易感僅猶躑躅
以悲鳴嫵媚不情何異盱眙而獻笑斯皆學術無守氣
節不剛間有風波之虞莫測山川之險或三言而成虎或

一隙以沉舟甚則蜂蠆起懷豺狼當路狡兔未得韓盧
爭先螳螂方休黃雀窺後斯人也何所取爾爲士者不
亦難乎如某者少則甚愚壯而寡與棲遲末路蹭蹬累
年再領簿書嘗爲勾稽之失一臨民社敢言撫字之勞
所願者惟畏法而奉公自信者不罔民而病物訖無顯
狀輒玷誤知挈短步於祿階脫卑飛於選集陶成有自
感服知歸此蓋伏遇某官大德有容至誠樂與傅鳴
鳩以羽翼文斷木以青黃使之物有成才器無近用致

此寒陋稍預選陞某敢不恪守官箴益脩德履不爲俗吏之効勉蹈古人之風貴不可求敢妄干於寵祿志須有立庶少濟於事功

謝監司薦舉啓

任子方

俯慙文槩居無補於毫釐旁睇匠師分見遺於樗散矧羣材之在列競一盼以爲榮乃錄疎愚俾先流輩得逾望始幸與愧并竊以自昔進賢皆期行道雖假借獎成或甚於謀已然周旋惻怛咸出於爲公故上既已專得

士之名而下必有以爲知己之報古今一變真僞莫分
後生躡趨競之踪前輩乏品題之力是以田歆欲自用
一士猶足揚聲趙勝笑妄從兩人終多慙德力振深弊
宜屬昌時如某者弗自激昂浸趨頽靡文史足用不知
糟粕之已陳松菊猶存坐歎功名之既晚竊塵庠序再
閱歲年說詩不足解頤談道安能絕倒會新學制獲奉
成規當大旆之按臨仰下風而彙進亟聞誨飭俾追譴
訶初無媒鬻之資驟被吹噓之力蓋精神所照才欲辨

而已明雨露既濡物不祈而自獲至公之譽多士攸歸
恭惟某官明辨而有容崇高而善下博通之學足以討
論一代之典章經濟之才足以振動四方之政事自持
使節親擁將旄以謂太平之功必以人物爲本故勤收採
罔間么微某敢不仰範前脩式期來効依鞭策以希騏
驥既不遐遺咨陶冶而爲干將請自茲始

謝監司薦舉啓

李廷玉

零落壯心未就求田之計徘徊末路猶懷入幕之謀中

愧本心外慙微分戴恩逾腆跼地弗容伏念某數則多
奇資惟極陋始遊翰墨謂功名可爲而亦可期逮涉艱
難知時命在彼而不在我雖已周於十載曾弗旣於一
官諒拙疎之有餘故坎壈而未艾進惟聊爾資升斗以
代耕去亦欣然適榆枋而滿志偶參羣俊俾長諸生會
明詔之一新事當責實顧謏聞之已竭分合投閒懷曠
官以自危欲斂衽而不敢雖嘗殫夙夜之智力曾何
補毫髮之事功矧積咎愆久稽竄斥人皆謂之不祥而

弗顧公獨察某甚憇而可哀嗣加薦論俾適夷途此蓋
伏遇某官義高乎一世識並於前人忠厚之風及物
而愈廣剛方之氣秉節而弗回其觀人也遺於短必求
其長其薦士也因其才不移乎勢受知者所以感激而
至於太息有識者莫不尊仰而為之聳聞顧樗櫟之
散才乃門墻之舊物載矜流落薦使遷陞昔孔融之得
禰衡既薦於前而無以躋之晚節晏嬰之遇石父雖脫
於難而不能舉於平時未有一叨顧盼之榮兩被吹噓

之德自惟會遇獨絕等夷而某智昧幾先名編都下駑駘失路固無歷塊之功烏雀懷恩猶有銜環之報

謝監司薦舉啟

張全真

無功而祿方愧平生之言宜黜而褒孰欺左右之聽伏念某器非世用學與道踈翰墨爲娛經病衰而已廢山林作計恍夢寐以空存惟五斗之倦游蓋十年之陳迹長裾不遂短製還新撫弔影以自憐捫苦心而太息尚繫造物以付我公半面立談爲降諸侯之重高堂坐嘯

許陪下客之餘語有蠢而姑容慮雖愚而或取傾蓋之
交雖偶泣途之感易深常恐賤微永乖報德之所敢恃
固陋更累知人之明載念微生自孤昭代賢貴力推則
意親而事遠英游並驚則人達而已窮雖平進誰所
不能而數奇自亦中廢臬廬不就笑五白之偶然虎豹
有神分九宮之邈爾自非宏偉不主故常豈由煨塵之
中猶分光潤之末相馬而失之瘦彼俗何知取人而拔
其尤匪才曷稱此蓋伏遇某官體國重寄爲時遠圖道

遵前輩而善誘於後來政擅久成而兼收于未至盛矣
孔融之坐歸然韓愈之門介以妄庸是爲塵點敢不益
虔所事毋替厥初皦皦寸誠徒記賞音之賜區區末路
豈專媒進之思

謝監司薦舉啟

黃夷甫

昔揚子雲被嘲老不曉事燭之武自謂壯不如人退惟
一己之間實兼兩人之短故規行矩步窮且不回身後
人先困而莫悟勉從下策出効微官聚糧有三月之勤

發軔輕千里之遠流離半世奔走四方竭來大江之南
屬在使麾之下實曰天幸豈曰人謀恭惟某官一朝偉
人四海令望梗楠杞梓凜凜隆棟之姿鐘磬笙鏞肅肅
清廟之器而乃謙冲自牧畧去威儀忠厚有餘曲敦風
誼念廐馬雖老猶思芻秣之恩轍魚將枯欲借霑濡之
潤豈緣名勢特出獎憐髣髴古人遭逢今日居然感激
實倍常情

謝監司薦舉啟

史唐英

繆政流聞難逃公議薦書褒借大過本心雖外激於懦疲
實中含乎愧覲伏念某稟生駑緩但務退藏賦性堅頑
不知變化斷斷真一介之士厭厭若九泉之人竭來御
吏以臨民果見隳官而墮事加以潛傷溪毒闇中山嵐
日益尫孱寢成沉痾杖扶骨立人掖尸行奠酒跪香固
難脩於祀事趨庭謁府頗久廢於官儀人有若斯世將安
用倘或含糊而竊祿必將顛蹶以隕身但冀生還敢論
榮進此蓋伏遇某官才高兼物道大容人謂其臭味

所同故提撕孤賤憐其衰窮易德故收拾棄遺乃於垂老之年獲霑不報之惠某敢不務求藥石冀保餘生益慎始終庶全晚節亟爲歸計載囊衣以行尚慰人心飲盃水而去不慙吾道是答已知

謝監司薦舉啟

葉少蘊

功慙實試祿愧空餐貸弗誅鋤已爲僥倖寵加論薦豈所堪任伏念某涉世頑疎受才淺薄學雖有志徒知泥古之虛言仕迄無成靡有資身之良策曾脩名之弗立

顧短技之已窮少忝盧前晚羞噲伍豈特汗顏而不耻
固以攘臂而自豪矧泉府之官寮皆外臺之辟置廩食
俱腆賞勸又優得之莫不欣然聞者亦或樂此自慙迂
拙敢歎衰遲夷甫於是言錢孫寶以之祭竈揚雄識字
方知鑄金莊叟忘筌尚驚躍冶蔑一毫之云補宜百罰
之所歸已幸并容仍加慰薦衆猶以爲不祥而弗顧公
獨察其甚愚而可哀載味品題更踰分量此蓋伏遇
某官純明弗撓閎裕好脩謂收名莫如薦賢而得人所

以報國猥容學步來佐指蹤顧踈懶者書生之所同不加譴斥而流落者人情所共憫更賜吹噓實盛德之所臨豈初心之敢冀某敢不益堅微尚深仰前脩零落摧翰敢復希於霄漢婆娑病木知徒費於生成但銘肺肝莫報恩德過此以往未不知所裁

謝監司薦舉啟

戎軺謹職使指露章望不素然愧將何若伏念某罷踈寡用質闇鮮通早塵祿仕之遊竊有功名之志遂更

武列思具邊員南服之征亦嘗致力西隅之守未始曠
官汙至此邦勉勤爾事然而犬羊之聚僅得之歡心貔
虎之羣各循於著令此即守封之當務乘塞之本圖得
免吏訶已為天幸伏蒙某官府憐舊物過睽涓
勞叨法座以言揚期上恩之器使俾無顛躓益用勸褒
謹當神明百為終始一節更集軍中之効用酬門下之私

謝監司薦舉啟

使指肅將驛書聞上拜嘉伊始撫已懷慚伏念某性本

拙艱仕爲貧素累世之學竊嘗自脩當年之功願有所
立濫齒朝紳之序獲更武弁之遊於時吳寇擾邊王師
宿野馳不測之地力就於戍城受必勝之謀嘗經于戰
陣自爾從征嶺表還守寒隅汔至此邦第爲常職若以
其謹封疆之備得種落之心俯道人言已爲天幸
伏蒙某官雲霓發潤衡度推公采累任之勤勞恤孤
蹤之留滯將期賞渥特露薦章謹當祇服官箴敬思爾
止更集異時之効仰酬舊日之恩

謝監司薦舉啟

張舜民

初憂累罰將欲去歸豈意文章更形褒薦受知越次負愧靡寧伏念某賦分奇窮稟生昧陋幸承閥閱亦綴冠纓惟趨時不達於變通故應物多成于牴牾勉循三尺濫分符竹之權僅守一官可謂斗筭之器誰爲汲挽敢冀騰驤此蓋伏遇某官理識絕倫聲猷跨世長趨濶步孰爭萬里之先大論高文自出一時之右肯憐孤蹇曲爲播揚某敢不誓立清名堅持素守雖錐刀近利無

補於本朝而尺寸微功自期于他日庶幾始末不辱高明

謝提倉薦舉啟

百里雙鳬欲望風而引去九秋一鶚俄倚漢以橫飛自
疑如出乎夢中爲幸實來於分外感深鏤骨愧極汗顏
某竊以觀賓於王顧下士莫非有德泰征其彙惟名卿然
後無私况屬盛時亟逢鉅哲惟月評而借譽緬風鑒以
生輝書自劉洪豈止賢於十部諾因季布政應勝得百

金肆令爛額焦頭端可攀鱗附翼獲是遇者獨何偉哉
某也文史陳人衣冠餘子祇因世胄冒玷官箴抗塵走
俗者二十年不堪回首號寒啼饑者數百指未免折
腰偶竊邑以庇身姑盡瘁而事國子文三仕浪云有功
而見知裴公一言固曰不求而自得靜言忝冒良有夤
緣此蓋伏遇某官直道而行樂善不倦敏手以衡其
輕重虛心爰燭乎幽深覩開闔斂散之要權務成就全
安於下吏盼睞而容光必照吹噓則與物爲春循致懦

衷亦叨獎拔某敢不靖共爾位夙夜在公正而不他第
堅持於一節老而益壯或少報於萬分

謝太守薦舉啟

楊嗣清

散木偃塗誤入公輸之度疲駑在廐叨逢伯樂之知服
寵增光被恩懷愧伏念某質非名碩才謝清流蟬腹龜
腸中慙義餒麋頭鼠目望絕侯封氣無湖海之雄心有
丘園之素政緣世累偶出仕途鬢謁二毛顧匪折腰之
具目迷三徑空懷種菊之思甘比羣鷄定非一鶚豈意

提衡之鑒濫加推轂之私優辱品題徒知慙仰此蓋伏
遇某官名高一世學貫九流身任道之汙隆言爲邦
之興替柔直有申伯之德四國于蕃文武兼吉甫之才
萬邦惟憲行賢而未嘗有已去智而不以驕人致此妄
庸亦加賞拔力借風雷之便將化龍梭肆調金石之音
更資牛鐸某敢不勉脩素業益勵壯心庶收翰墨之功
少答吹噓之賜

謝太守薦舉啟

王致君

職守方郡鼠技已窮名聞公車鶚書交上薦叨獎拔倍
負兢慙伏念某閥閱已衰名實素下挈瓶近智無所建
明刻玉小材安能施設雖殫意竭慮公以忘私而左支
右梧勤不補拙敢圖寵借下及孱庸此蓋伏遇某官
廟朝羽儀社稷寶鎮綴蘭臺之法從高踐亨衢殿淮海
之名邦光揚遠業尚收孤跡謂有可書欲使迅騰曲加
藻飾某敢不脩持晚節庶圖橫草之功砥礪微忠更盡
鉛刀之用上酬天造次答已知

謝太守薦舉啟

魏伯友

靈恩朴拙何以立官玄保頓昏安能辦事政虞訶斥翻
辱薦論不敢矜榮祇以增愧伏念某人中下品海內卑
門孝裕為衆所嫌叔夜處世不遇青雲絕望罷許孰與
之佩刀白眼相看遺去幾奪其手板不圖褒借猥被衰
寒此蓋伏遇某官百世華宗三吳望士榮躋內閣翺
翔侍從之班寵殿侯邦偃息藩垣之地曲憐去物遂及
孤蹤某敢不益慕前脩更敦素尚懷黃金而結紫綬豈

意於餘年飲墜露而餐落英行棲於舊隱未知圖報但
極悚銘

謝太守薦舉啟

宋嗣宗

委吏之賤疲於一官報政之遲踰於三月過蒙褒薦良
積悚惶伏念某椎鈍寡聞支離多病初無才藝以取聲
名豈有異能追攀豪傑韓吏部年老而身困孔北海意
廣而才踈自絕騫騰孰能推挽第安林野以俟譴訶此
蓋伏遇某官名映朝倫才高王佐謀猷宏遠史弼負

幹國之能德度恢鴻韋斌得大臣之體將陟鼎司之峻
先儲天下之才致茲虛庸亦預收採某敢不尚堅晚節益
勵微衷埽地焚香誓克修於素志澡身浴德期不累於清
塵

謝太守薦舉啟

宋敦詩

阨窮滋久聲跡浸微固已絕望于飛騫詎復萌心於進
取忽薦言之下逮溢愧汗之交流伏念某愚不自量妄
嘗有志始遊翰墨謂功名可求而必可期中涉艱難知

欽定四庫全書

五經補注大全卷三十五

時命在彼而不在我飄然隨牒聊以代耕幸獲造於門墻
欣竊聞于名理何止暫忘于羈旅固已倍借於輝光仍
沐恩私亟加慰薦載詳品目更極兢慙此蓋伏遇某
官德盛而有容望高而善下矜此疎愚之質許以無他
採其蕪累之詞謂之可教不忍遂隳其素志必使勉及
于前脩力賜吹噓庶幾振起駑駘失路固無歷塊之功
頑鑛遭時尚有發硎之意未報恩德但銘肺腑

謝太守薦舉啟

趙德莊

浮湛宦牒久絕意於清流洒埽門牆忽盜名於上客餘
光所被善類知歸伏念某愚不通今拙而嗜古百世而
下莫究聖人之大全中年以來不堪世路之多故簿書
汨沒師友散亡驚短髮之既華悼初心其已遠覲從煩
劇尤失故常當民敝財殫爲方今之公患政苛斂急豈
學者之安行故嘗取予於權宜不盡拘攣於文法苟少
紓於罷俗亦何愛于微躬所幸仁主大明日月其照我
公盛德父兄乃心用能三歲之間或致一毫之效然塵

欽定四庫全書

五百家拙芳大全文粹
卷三十五

十八

埃不可以薰沐拜起甚慙于步趨舉瓢而酌天漿坐嘆
星辰之遠比屋而聞人籟益知耳目之卑謂當黜而外之
豈曰從之游者惟時指授不愛巧雕出五色於探囊既
將脫其毛骨捐千金於敝帚又復借以齒牙豈徒了于
二生固足施於後世此蓋伏遇某官道存長育業懋
經綸世爲儒者之宗故常恐斯文之墜地身任天下之
重故陰求當代之遺材有如妄庸何以稱塞某敢不洗
心矯節俛首下風補劓息黥舍治人而治己淪肌浹髓

持報國以報公

謝太守薦舉啟

泮水橫經慙蜀地學官之選天臺上奏玷汝南月旦之
評拜賜尊榮撫躬若惕竊以諸公要人之勢利亦何門
而可容先生長者之典刑或曠世而難遇寧賤貧而堪
忍惟道德之依歸一蒙備類于籠中足以成聲於海內
况此收憐之意出于特達之知未嘗待其自言亦匪因
于借助茲古人之能事今復見之顧新學之小生何以

得此伏念某顓蒙有守困拙無稱傳緒業于父兄乏淵
源于師友淺聞甚陋莫知貳負之名單見易窮豈識撐
犁之字粗勤操守敢昧端方愧在前之牝糠偶冠多士
玩既往之糟粕未通羣書固宜守寒士之窮寧復有熱
官之望曾是鵲林之托據煩鶚表之騰假要路之梯航
借層霄之羽翼茲盖伏遇某官神機警言悟德宇閔
深振絕學之無傳笑諸子百家之陋起斯文于既墜有
三代兩漢之風啟後覺於晚生凜清名于末俗四登二

千石之重咸著能聲一飛九萬里之途旋躋華袞益廣
江河之量不遺葑菲之微謂敗鼓之皮亦無嫌于芟
而焦桐之尾或可備於宮商致此孱庸驟蒙推挽某敢
不益堅素尚勉力脩名國士之知期必酬于異日私門
之謝聊自同于衆人

謝太守薦舉啟

負弩馳驅方廁登門之列剡書慰薦濫當開府之初名
爲市駿之圖實出點蠅之誤事非願始榮與愧并惟縣

令視民爲親與諸侯分地而治以道自任昔人尚鄙於
催科厥流寢訛末節乃專於財賦緩之則乏供于公上
急之則起怨於里閭敝精神于錙銖之微捐名節于商
賈之賤良法具在鮮聞德意之宣仁人滿前不見循良
之政有能時其取予節以儉勤惟務本以養民財毋奪時
以盡地力上不負明天子之詔下足以解賢刺史之憂
庶幾隨亨可以益裕如某者不才自棄多難早衰百年
紙上之空言僅同畫餅十載幕中之漫仕殆若飛鳧退

將遂于歸愚進豈堪于治劇矧冠蓋往來之會乃江湖
卑薄之鄉邑居蕭條莫稱過客年穀豐美尚多流人固
當加意以撫摩安敢容心于攘剝吏責既曠人事寢睽
失伍待三甘于抵罪會課第六幸而免歸豈期惓惓之
愚乃動高明之鑒以平平而似簡謂兀兀以類勤引而
升堂溫若挾纊退而論事應如叩鐘念欲罷而未能抑何
功而可錄伏讀褒語有覩過情而況法宮獨斷之餘惻
怛屢形于擇令大府簡僚之始激揚尤貴於得人有如

妄庸何以稱塞此蓋伏遇某官忠存社稷望重搢紳
潤色王言得典謨之正體作成士類起洙泗之遺風力
爲後進之階克罄上臣之節不忍孤白之反衣未厭緇
衣之改爲故于寸長或至三歎某敢不匪躬盡瘁篤志
好脩苟歎息愁恨之不聞有辭于上雖倥偬喧囂而自
困遑恤其私

謝太守薦舉啟

趙德莊

羣趨旅進官微尺寸之功衆棄獨收事絕尋常之表羈

窮增氣寒素懷歸伏念某名在腐儒初無長技挾策於
前輩彫零之後彈冠於殊鄉轉徙之餘老將至以徒勤
祿既浮而不愧逝從散地漸歸宿于夷途敢託上交自
銜媒於當世矧陪下走驟望餘光無簿書米鹽以奔走
後先有贈勞宴賄以勞費左右曾是品題之誤得諸
拜起之初畧後生之無聞謂孺子之可教采葑采菲草
芥已微如山如河塵露奚補深惟志士之報德坐恐餘
生之後時若爲推揚重以論薦言非俗好難語於通人

文與氣衰詎追於作者然而少學雖陋而粗耻於無用
孤官已卑而竊期于盡誠使之少間貧病之憂有如過
聽妄庸之意尚思扶義不敢愛身悼此志之久違爲已
知之一發此蓋伏遇某官長民尚德憂國思賢身任
九流之銓衡各極器能之用經爲萬乘之師友兼收章
句之長下賓榻於塵埃訪遺賢於江海求之太廣濫者
或居某敢不益信所聞力鞭其後豈惟進退視為主於
遠臣尚謹始終用能施於後世

謝太守薦舉啟

伏蒙知府郎中奏舉改官任使者縣僚解局孰敢嘆三年之淹郡守飛章獨念有一日之雅雖舉舊自昔以爲義然改秩豈愚所可當固應得之若驚且幸伸於知己某竊聞管仲以善交而友鮑叔亟蒙堂阜之迎王徽以進士而附徐商爰受荆南之辟夫惟久與之出處乃能備見其否臧未始擇焉而不精庶幾舉者有所試斯謂名止於實勿憂稱匪其人靜循黃綬之賤儒蓋辱朱轡

之曩好聽其言而觀其行既嘗博我以文據於德而依
於仁更欲成人之美借月評而激賞回風鑒以增輝書
自劉洪非特賢于十部諾因季布雅宜勝得百金坐令
門下之諸生不作溝中之棄物獲是遇者亦何偉哉某
也問禮聲微行歌族冷幼被過庭之訓長從扶策之游
敬業樂羣粗熟周鄉之射御陳力就列浪陪唐穀之英
雄由東粵以奉親指南昌而竊祿鷄鳴狗盜偶終歲以
無聞馬勃牛溲亦有時而可用遂沐鄭莊之推轂式酬

貢禹之彈冠公叔同升大夫僕今猶古也臧文不與柳
下惠彼何人斯可以使鄙夫寬而薄夫敦真所謂久相
待而遠相致裴蘭在野但知直道而行禰鴛橫秋忽
慶不求而得退省際會實有夤緣此蓋伏遇某官閭
苑清流崑崗粹品名聯二俊允爲吳郡之文宗學貫六
經克紹松江之高士蚤決科于羣彥繼拔萃于庶工已
誇語三日而見奇何止歷四州而稱善達不離道進思
盡忠登芸閣者十八人獨推豪傑奏楓宸者三千牘風

著謀謨綾衾夜直以寬清雞舌朝薰而暮爽遽辭榮於
丹禁聊共理于黃堂政布六條頌興五袴隼旗熊軾方
試可以蕃宣鳳沼鸞臺即升華于輔弼而又篤斷金之
密契存結綬之遺風憐其附翼以攀鱗謂可昂霄而聳
壑故雖孱弱亦預獎提厚莫重焉綽有故人之意我之
懷矣忍忘平生之言某敢不謹所設施高其標置確乎不
拔窮且益堅萬里從軍喜吹噓之有便一心圖報惟職
守之是勤常俾能舉其官無負賢友不棄過此以往未

識所裁

謝太守薦舉啟

趙德莊

乘流浪出猥叅幕下之游旅進冥行庸覲坐中之識
上臣所志末俗以驚伏念某妄讀父書失師吏道江海
之送日月多病與衰雞豚以燕春秋久閒而廢維此羈
宦出于濫窮輕千里而竭來留二年而忘去遶樹三匝
其孰聽于悲吟賜壁一雙敢自徼于異遇方輻蓋鼎來
之日聞道途相慶之謠謂平生先德而後刑且家世誅

身而下士私竊自幸庶幾少安不意交游有及姓名之
賤廼于官府遂忘形迹之拘重遲而不以爲媿媮造次
而能照其悃悞至于寘諸尊俎之側雜以詩書之娛聆
高詠于胡床還素風于太始雍容文物主人何媿於湖
南尚想風流下客如升于東閣慨附麗之既晚顧遭逢
之已榮敢以私恩更污公舉蓋前輩與人而必舉而大
賢樂義以無窮使之假翼而冲霄猶將市骨而得駿此
蓋伏遇某官清而不撓大以有容愛善如愛厥民知

人如其政包涵九德心期一代之英材進退百僚手
傳先生之能事眷主知之益厚繫士氣之方增有若妄
庸何以稱塞某敢不冥心信古刻意好修裏章服以自
矜竊起彈冠之念望山林而告語共希曳履之光

謝薦舉啟

猥以庸虛過蒙知遇既免尤譴復加薦論自省孤危兼
之衰病生而賦朴野之性愚不識禍福之機但知任已
以直前不復周防以慮後動觸時忌言爲身災擠而去

之則為有功引而進之亦或招悔自非不以利祿為意而以仁厚為心顧茲鈍頑誰肯收錄伏惟某官時望至重主知已深方將長育於羣材專務掩覆於小過憫其持身之甚拙進絕望而退無歸知其為政之雖迂歲有餘而日不足特矯世俗借之齒牙某敢不祇畏簡書益自脩飭豈云報德苟不辱知過此以還未知所措

謝薦舉啟

趙德莊

三年去國從學官簿領之書千里推賢辱宗袞陽秋之

字雖異姓古人之爲後然成材今日之居多特屈公言
豈非高誼惟汪氏蟬聯之緒出軒皇派別之餘壽等神
仙祠伯有魚龍之號名聞軍旅聖人書社稷之功遙遙
譜牒之相傳沒沒衣冠之不振雖更晉魏之遠莫廁崔
盧之間敢期自附一代之英髦猶幸上同百年之鼻
祖間生賢德膺運半千坐使衰宗去天尺五瓜瓞已興
于嗣歲豫章方託于深根非無他人未足知己矧何並
及君公之貴而謝莊從康樂之遊宜其臭味之同借以

齒牙之重幸雖至矣誠豈偶然如某者天與冥頑人誰料理
但欲陸沈於州縣未嘗鉤致于聲名一命江湖無蚍蜉
蟻子之援窮年書史有螻蛄鳳皇之嘲中因俗駕之回
益嘆儒冠之誤政恐墜緒安能亢宗敢倚門闌投為子姓
力推寒士以報國且喜富家之有人天生五材非聖賢
而曷用河潤九里資宗族以爲多此蓋伏遇某官經
術宏深人倫高妙青天白日誰不仰于清明璞玉渾金
終莫名於器用出入興賢之省始終當宁之知依菁莪

樂育之時爲巖石具瞻之地豈獨林宗之好士借之聲
光因知祐甫之無私多其親舊深憂謫薄難稱生成某
敢不持此銘心永爲鏤腑酬國士品題之賜附名家閥
閱之光

謝薦舉啟

棄地寒灰已絕思於溫煖淪溝斷木何敢望于丹青物
理固然天意莫測借一毫造化之力爲萬物駭異之觀
冷焰將遂復然華藻至于均被揶頤退省點額銜恩竊

以行己甚難售知匪易馮煖激田君尚須彈鋏伯牙捨
子期遂至絕絃矧夫涉瓜李之嫌甚矣有氷炭之隙撚
鬚太息知正道之孔艱撫掌長吟厭人情之甚薄爰用
時態慨念孤蹤謂學術空踈鄙之則宜以趨向謬誤遠
之則是第栖栖而信命敢咄咄以尤人夷考前芬粗平愚
憤叔皮爲融幕之從事孟堅領憲府之護軍溫造不辭
重脣之賓馬融嘗應鄧騭之名不特一時之樂事且爲
萬世之名談非倚高明莫緣數叙自叨庥庇之幸首膺

盼睐之溫遽辱褒揚不藉阮瞻之三語再蒙然諾殆逾
季布之千金已在品題終加收錄此蓋伏遇某官深
造道本洞燭事機矜小賢而不遺慮一夫之失所持心
渾厚優哉獎善勸能處己公忠足以磨世勵俗是致葑
菲之冗瑣亦隨桃李之敷榮某誓當激昂懦衷勉堅壯
志慕子文之從仕少酬廉恪之稱鄙州犁之用情聊副
詳明之譽庶幾罔悖鯉庭之訓抑亦不玷龍門之遊

謝薦舉啟

三年簿領方默愧于仇鸞一日雲霄俄顯追於禰鸞恩
深河海感極肺肝某竊以運偶中興時多上哲務薦賢
而盡臣子之節期稱職以立邦家之基當得英豪若絕
類離倫之鮮儷庶觀器業皆窮高極遠之不凡靜循百
里之承宣庸副九重之任使公卿由此途出令尹難其
人哉儻非桑雉之前脩莫宜民上曾是轅駒之下品反
在選中必固與之可謂仁矣某也志雖尚德學不競時
師友古人幸襟期之猶在塵埃滿路惟世賞之可羞竊

斗粟以奉親誓寸心而報國靖恭花縣密邇霜臺漢斧
生秋每欲望風而去鄒律噓煖嘗試瀝血以求將按劍
之是虞豈拔茅之或冀亟回鑑水曲省黷桐念戢吏愛
民之方粗知留意曰趨事赴功之敏寧不厚顏俾脫免
于拘稽遂升華于撫字永言際會實有夤緣此蓋伏遇
某官自誠而明樂善不倦包蘊列城之簪笏靡恨遺材
發揮當路之權衡誕開公道肆令孱陋亦辱掄揚某敢
不朝薤暮鹽夙興夜寐甘官箴之藥石窮且益堅凜士

檢之冰霜死而後已用圖薄效少報殊私

謝薦舉啟

趙德莊

官分縣社初乏吏能書奏公車驟膺名薦荷恩增愧撫
已爲榮伏念某魯鈍少文木愚乏警志有丘園之素氣
無湖海之豪慕君子有所不爲知古人未嘗乏仕猥驅
俗駕濫綴官曹挂頰愛山未忘餘習折腰爲米已負初
心試綰銅章謬臨花縣鳴琴不韻製錦空傷政拙催科
考宜書於下下誰先傾倒人每見其平平疲駕絕意於騰

驥散木無心於琢削豈謂提衡之鑒誤加推轂之私此
蓋伏遇某官盛德表時淵謨經國宏才優於剗劇厚
性足以鎮浮允爲世臣卓備賢業權衡士類冰鑑人才
錄箕斗之虛名采菲葑之下體縱毛錐之脫穎許由瑟
以升堂致此凡庸亦加品目功借風雷之便將化龍梭
律調金石之音旁資牛鐸某者敢不勉以未至尊其所
聞上答已知下逃官謗

謝薦舉啟

松鄉佐職坐有三年之淹蘭省飛章初無一日之雅始望不及此何德以堪之榮聳簪紳感深肺腑竊謂惟善能舉其類上臣事君以人簡賢而任良陋志目中眉之小識息黥而補劓開攀鱗附翼之宏規靜言疑似之難分動輒忠邪之相半必也久與之出處庶乎槩見其設施曾未聞無因而至前况敢冀不求而自得借有是事假屬非才如某者少挾壯圖長辜素蘊師門刻意耻自名世祿之家仕路強顏寧復非良弓之子念再游于蓮幕

思一割于牛刀必琴何益於民功彌鶚亟騰于士譽常
徒役役豈曰能賢善誘循循亦云可使昔未親謦欬之
末今乃置眄睠之中古人以是存心流俗爲之喪氣請
原其本有致而然此蓋伏遇某官進思盡忠達不離
道早推先於人傑聊試可於天官春入綾衾寒谷已均
于餘暖秋橫水鑑纖毫咸燭於清輝肆令慰藉之私旁
暨妄庸之吏某敢不申嚴士行寅舉官常植澗喬松不
爲三冬而變節辨途老馬常遵千里以効勤苟無爽于

初終或少酬於知遇過是以往未知所裁

謝薦舉啟

右某伏准照牒保舉某暫充改官親民任使者居官莅事初無毫髮之長爲國掄材誤辱齒牙之及省循非據感愧交深竊惟古者薦能付之公道衆多奚擇惟輿論之爲先容表裏相符雖小用可知大節此風不振有年於茲非遇間世之賢曷復非常之選如某者儒生至陋吏材尤踈初不能激激以沽名亦不肯泯泯而隨俗屬

佐一同之治獲趨五馬之塵當循名責實之時不容苟且
在趨事赴功之列各務進脩自視妄庸尚虞譴斥豈期
名姓夙誤聽聞方其下車之初已有推轂之意逮茲收
錄實倍寵榮茲蓋伏遇某官盛德鎮浮至誠格物以
清淨寡欲之道濟剛毅不屈之材非惟不畏于高明亦
且無遺于寒畯以所聞而叅所見棄所短而取所長憐
其遲鈍之資僅能將勤而補拙知其奔走之暇尚以餘
力而學文遂加一字之褒以增九鼎之重某謹當勉所


不及行其已知今非介而前非通立聖人之中道仁不憂而智不懼慕壯夫之遠猷期於終身上答知己

謝舉試刑法啟

伏蒙某官奏舉某堪充試刑法官者坐局何堪方喜崔松之茂致身有幸亟聞禍鶚之飛愧益顏間恩從望外某竊以俊又在位明慎用刑顧六合橫目之民或陷乎罪念一人好生之德必欲其平惟能得于張之賢而薦諸朝庶以輔堯舜之仁而極于治獲是遇者一何偉哉某

也樗櫟散材斗筭小器誤玷絲綸之寵猥忝簪筆之華
來百里以備員姑試承流之政執三尺而願學早萌折獄
之心借未能遠追淑問之臯陶庶亦或近取遺直之叔
向在我而已其誰知之非偶先覺之無私孰憐後進之
有得靜言提拂良出夤緣此蓋伏遇某官襟海非塵
懷冰不翳兼善一時之風俗周知百吏之否臧論道經
邦將策足青雲之上愛人利物尚留情載筆之中坐許
公膺例堪審克某敢不申窮律意寅奉官聯此生召伯

之甘棠會令封殖他日傳巖之霖雨更冀沾濡過是以
來未知所措



五百家播芳大全文粹卷三十五

欽定四庫全書

集部

五百家播芳大全文粹卷三十六

七

詳校官編修_臣謝振定

助教_臣常循覆勘

總校官編修_臣王燕緒

校對官中書_臣李荃

謄錄監生_臣潘士新

欽定四庫全書

五百家播芳大全文粹卷三十六

宋

魏齊賢

葉茶同輯

謝啟

辟置

謝辟充教授啟

唐子西

命教之始置師惟難既非所堪適足爲媿伏惟某一離

國學十閱歲華歟兩任之鄉軍自云得趣負三年之令
弩未始辭勞止於爲貧無所不可獄訟刑名之職皆是
道場簿書錢穀之間莫非樂地况優游於儒術復咫尺
於鄉枌便於婚姻得以數學有幸如此歸恩可知此蓋
伏遇某官匠石人材甄陶士類好賢樂善每推引類
之心憂國愛民深軫思皇之念致茲後學得託下風才
地非堪固難勝於重責雲天所庇將銘勒於初心感佩
無窮敷宣罔既

謝辟南京簽判啟

蘇子由

少年遊學方成都樂職之秋壯歲効官後淮陽卧治之日矧留都之清淨眷幕府之優閒再辱辟書重收孤迹哀憐廢棄之久誰復肯然綢繆樽俎之歡亦非偶爾伏惟留守宣徽太尉才高一世望重累朝體河岳之兼容納涓埃而不間衣食有奉已寬盡室之憂道德照人况復終身之幸其爲慰幸歡喜難盡敷陳

謝辟置馬務啟

唐子西

書生所學粗記姓名軍事方參未知拜起心勞意拙事
廣才踈績未考三罰將滿百抱關擊柝直爲貧之所宜
毀瓦畫墁嘆無功而食祿夤緣厚幸依託下風惟憂鼠
技之窮寧顧馬曹之辱建今三載雖每侍於燕閒未始
一言輒有求於左右豈有意於爲異蓋自耻於無厭遽
辱見收實過所望此蓋伏遇某官賞信罰必事易說
難其交物也淡以親其待人也輕以約遂令頑悍亦費
陶鎔某敢不祇畏簡書服勤薄領一丘一壑既未遂於

初心三沐三薰其敢忘於厚德感佩戰越不知所裁

謝辟差醋庫啟

滕子昭

索長安之米五斗有萬鍾之難失中流之船一壺若干
金之獲位雖至下恩實非輕竊以仕有時乎爲貧食焉
可怠其事職既司出納之吝任初無貴賤之殊矧茲醯人
之微掌於周官之舊日取不竭本源出糟粕之中歲計
有餘煮摘亞海山之富苟非明財貨之術豈足盡錐刀
之能如某者賦分酸寒稟生艱苦囊錢羞溢誰憐甑內

之塵餅粟屢空自笑甕中之蠃未厭小人之腹徒聞君子之交僥倖舖糟而歆醅妄意乞漿而得酒不謂斗筲之無用亦預粃糠而見收會計何堪涓滴莫效此蓋伏遇某官才全武庫名重金甌世高濟美之忠人有調元之望負伊尹之鼎志豈在於割烹和傳說之羹道本期於啟沃無膏梁公子之習軫蘼鹽寒士之憂欲觀聚蚰之能俾廁濯龍之選直在中矣方待善賈之沽求則得之不假乞隣而與某敢不攻苦食淡激濁揚清仰副

作成之恩益體曲直之性仲尼發顏子之覆倘使知天地之全趙文舉晉國之賢庶不遺莞庫之列

謝辟置幕屬啟

提筆文場已玷師門之高第彈冠仕路乃叨賓幕之元僚自惟何人致有此幸竊以諸公要人之勢利亦何門而不容先生長者之典刑或曠世而難遇寧賤貧之堪忍惟道德之依歸一蒙備數于籠中足以成聲於海內況乃收憐之意出于特達之知未嘗待其自言亦非因

於借助茲古人之能事今復見之顧新學之小生何以
得此伏念某學非通務資不踰中壯歲激昂妄謂勲名
之可致長年蹭蹬忽驚齒髮之將衰偶竊儒科繼罹家
難薰心憂患莫堪積歲之窮愁唾手功名非復當年之
壯氣自甘屏迹豈合干榮屬當軍府之開遽枉賓筵之
辟虛名增重有識嘆嗟謂李大夫取人不常乃爾特舉
而石處士以道自任庶乎有成豈惟私惠被於一夫遂
使頽風起于千載此蓋伏遇某官吾道正統斯文主

盟何自爲郎頗嘆馮唐之不調問誰可將或言充國之
未衰遂付雄藩兼臨絕塞山頭落日想墨客之風流雪
外孤城聳將軍之號令爲此府望須我輩人矜憐弱植之
無依屈賜公言而見取靜言會遇實邁等夷謂無人于
東都固所不敢稱知己于天下亦足少伸感激之深數
宣罔既

謝辟置啟

范西叔

駕彼四牡初瞻華節之臨致者二人遽造長途之馭荷

鈞陶而愈重揆綿薄以何勝冒昧來前兢慙去所竊以
春秋同燕社固俗態之相歡富貴歸故鄉亦時情之共
樂究觀往哲間處舊都不過露印綬以誇邸中負弩矢
以馳道上或為相數昆弟之罪或興師入父母之邦私
快恩讐俯驚童孺來于公之駟馬既顯何為散疎傳之
黃金雖賢無補未有激揚于風教專圖簡拔于人才近
接枌榆旁收葑菲獨振汝南之價首空冀北之羣高掩
前聞竄為盛舉宜得魯諸生之秀異少慰蜀父老之傾

瞻有如蒙馬直易與耳鼓無腔而自奏碑沒字以何爲
輕玷一官浮游萬里辨舌敢驚于堅白夢魂不到于軟
紅空回天際之舟甘戢雲間之翅餓麟不噬誰爲落毛
窮猿投林宜暇擇木乃與阿堵物爲伍大爲寧馨兒所
嗤已自分於陸沉寧有期于羅致喜憐兵騎猶振塵矜
倚推轂於鄭莊懼懷此志許著鞭于祖逖驟過初謀坐
令一介之微頓增九鼎之重不圖畫餅亦濫吹竽茲蓋伏
遇某官智鑑圓明文衡公亮士冀登賢於鳳沼時爭

仰德於龍門廣西雍樂育之心舉同金鑄秉東觀刊脩之筆深謹袞袞方宣旨于岷峨會炳靈于江漢豈無後出來副先登典型具存肺肝藉慰曳裾而飛名譽固賴仇香用士以報國家詎須種高靡嫌平進均預特招正恐涓埃難酬橐籥竊念某久居突與叨預提撕兼收腹背之微頻借齒牙之重念顏氏之居陋巷孔子賢之取馬士薦之朝廷何侯力也薦於今日期以古人尚殫翼翼之恩少罄惓惓之義豈特西州之人士愧在盧前庶幾

東閣之衣冠願從隗始

謝辟置啟

張少瑜

病即丘園本期脫屣老依幕府乃復跨鞍爲然諾而遽
行豈出處之敢必伏念某才無適用學不成功族久弊
而弗支身既衰而愈困少年意氣真已蕭然平生交游
殆無顧者獨執事之用意有昔人之遺風每當薦賢必
以充數跡高奴之重地控勁敵之上游謀帥多屬於偉
人責實每難于他路顧雍容談笑之際雖資三語之勝

流而緩急幾微之間實藉百中之奇策乃容迂濶復玷
招延此蓋伏遇某官以邁往之資當折衝之任才兼
衆智守之以謙虛威鎮諸羌持之以詳重過收人物以
就功名某老廢詩書無復倚馬之氣窮更憂患庶幾徒
薪之謀即望旌麾不勝悃悃

謝李邦直辟置啟

吳則體

引領下風念未聞於聲欬脫身酒輒曾罔待於鳴號揣
心實慚戴德良厚伏念某器惟樸鄙族本單平考古則

嗜乎先王之言行已則異乎末俗之好學知修性仕特
爲貧久忘紆朱拖紫之榮粗得曲肱飲水之樂獨立不
屈殆遺物而離人逸處無榮耻以故而減命蓋討論於
六藝已侵尋于二毛索墜緒于堙淪蔽鬱之中究微言
于散絕殘缺之際委棄詖行擯斥詭辭道擬窺乎大全
養固捐乎小體每悲螻蟻之智易竭誠懼天地之蘊難
窮素志或乖沒齒銜恨疲精盡慮反同惠子之據梧
剗食生全頗美支離之鼓篋術益進而譽益泯年愈老

而形愈孤愧俯仰以徇時聊翱翔以娛意收功維寡詎
羞抱甕而灌畦涉世屢竒頗欲就陰而休影節苟存于
一介祿奚顧于萬鍾飄然浮轉之軀兀若枯槁之木文
繡獨嗟乎芻狗青黃寧纂乎犧樽藜杖貂裘跡未羣于
麋鹿石田茅屋夢已落于江湖其誰哀憐祇自憫笑知
語默顯晦之有義悟潛身用舍之皆天俾乘馬而從徒
甘抱關而擊柝豈期屯蹇遽辱採收此蓋伏遇某官
偉行軼倫閎謀超世遠畧足以安社稷高文足以追典

謨紛紛妍媸舊入於甄冶擾擾動植常寄以權衡弗以
杞梓自美而陋乎樗櫟之材弗以軒冕自夸而賤乎草
茅之結吹噓朽腐以律呂之氣被飾昧陋以虹霓之光
凡此滯頑亦加策勵豈以謂能否不分則駑馬或先乎
騏驎利鈍靡察則鉛刀或貴于鏌邪將剖黑白於混淆
明是非于繆亂委僊羸薊佇獲託于醫師之門擁腫曲
拳未見黜于匠石之手誓勤緒業用答誤知過此以還
未知所措

試館職

謝試中館職啟

王致君

辱賜聖策下諏鄙臣質之以詩書治古之所傳副之以農桑孟子之所論才難盡志筆不逮心至于前世之宜當今之獎聖賢之法度天人之際交拳拳未列于孤忠瑣瑣僅能于小補宗工垂借第等過優徹旒纁之聰明入廟堂之甄化越自蘭臺之冷秩躡升書府之秘遊寵榮有殊感懼亡措於穆盛世幸逢極治之君思皇庶臣孰

匪碩學之彥素養而待倉卒之用器使而議鴻纖之材處是位者責是功辨其事者付其責况于簡冊之所英俊之躔多文章經術之老處其間亦公卿牧伯之任出於此秩以太官之稍膳增以內府之俸泉使無芥蒂之勤以牽乎事外俾無塵苴之累以汨乎胸中思慮不分而道明進止有餘而氣壹士遠乎賤而爲周之貴學得以肆而非秦之拘則可以夙夜鉛丹左右籤軸浩乎泛古今道德之海曉然見治亂安危之途當言而言豈爲

無助有用而用所向悉宜顧惟中下之資猶躋仁智之品若某者進按名責實之治乏趨變通時之宜辦不足以揚王庭勇不足以建邊畧昧于理財而不足以語計踈于言法而不足以評刑凡是數端舉無一可其在聖世當爲廢人惟學是專乃性之病耽尋經傳而成癖亡遺冠屨而幾愚至如灌浸切磋磋人以爲勞而已以爲樂剗研編削怯於所短而喜于所長比者幸會于天處得其地生死願同于書蠹咿嘵無嘆于囊錢庶幾義易之

養蒙龔卜揚雄之終老重念某惟物輕重沿時盛衰嚮
立是科間出奇士蓋取之甚隘則來者幾希由待之既
殊則舉思自奮歷時既久其終寢微致或上言指此學
之可廢近復著令罷推恩於從來顧是庸平分宜澄
汰豈期援取于末屬收拾于殘餘仍採薦論亟膺簡拔
此蓋伏遇某官開廣治具贊襄睿文思人人之盡其
能欲物物之得其所謂選士可以報國謂博古可以救
時姑擢謏聞更觀後効誓竭有爲之志仰酬不報之仁

謝試中館職啟

翟公巽

奉對西清凜天顏之咫尺策名東觀近雲漢之昭回顧
影自慚無顏以寄惟石渠天祿之府秘金匱玉版之藏
翰林墨客之文章河圖洛書之典訓怪如齊諧之所志
微至稗官之所收極備至於方言其流及乎瑣語煨燼竹
簡發羽陵汲冢之編科斗漆書讐魯壁淹中之蠹蓋古
人禮求諸野而史官學在四夷僅有典型誰云古昔仲
尼之悼借馬猶及闕文夏禹之尚遺聲以存追繇自非

網羅百氏之學貫穿千載之間約六藝以成章洞九流
之領畧孰能刪除繁穢放失舊聞得商頌十二篇考次
逸詩之缺取武城二三策緒正古書之遺至于曉幼婦
之微文釋皿蟲之訓纂討論款識辨岐周桐鼎之銘
義證古今跡東漢顯陵之策唯時選遴益歎才難固將
廣豪傑之儲須以待朝廷之問必如前哲增重此名而
况切近禁嚴雍容嘯諾建章鳳闕望帝極之太微策府
玉山應星躔之東壁欲掄材於人物聊養望于歲時某

意廣才疎心勞志大空懷憂國見謂狂生中捐末路之
差池未分昔人之憂患爰從宰掾入筵書林汗青簡以
長年絕韋編于卒歲初無聞於是正獨能問于何如恭
惟某官德盛阿衡師惟尚父服袞衣繡裳之命數寵冠
上公偉龍章鳳姿之儀型照映羣士畧春秋責備之法得
天下英才之歸雖此妄庸不忘教育孰云晚出得預斯
文乃眷蓬山世唯舊物慨流波之未遠創風樹之纏悲
再命微躬相望踵武惟先人嘗掌斯事獲覩前修卒父業

復總羣書敢期故實永言陟岵之感終廢蓼莪之篇然
而以先儒之熟訓詁而誤爾雅之螭蜺大夫之識具教
而名先君之獻武况如淺陋無乃闕疑庶幾農馬之專
可與蟲魚之注述陶唐至於麟止安所發明頌聖主之得
賢臣或能論著

謝試中館職啟

任子方

落筆玉堂之上僅綴千言振纓冊府之游濫陪羣俊論
說無本文辭不工序當今可舉之政事則未究人情考

先王已行之法度則不聞古訓訖無可錄退有後憂豈
意江湖納污川流一貫龍蛇啟蟄蝮步同伸雖幾去而
復收終以榮而爲懼惟天祿石渠之故事乃琅函秘笈之
所藏或出于秦人煨燼之餘稍見于汲冢斷殘之後書
尤難于盡信史已甚于闕文寢聞諸子之異同頗識古
人之章句詳延淹雅分命訂讎煥爛遺文上占東壁憑
陵危觀古謂蓬山坐尤迫于帝居人或夸于仙去多士
願聞其掌故名臣輩出于此塗由漢則子雲劉向以經

術登庸在唐則九齡房琯以辭章入侍故博洽名家之士萃聚乎東西兩京太平儒術之功浸淫乎數百餘歲得人甚盛曠古所無國家累聖紹休生民保乂圉圉空而俎豆布干戈藏而鍾律脩百度可觀皆博士儒生之論四方來獻多山巖屋壁之書永惟英皇對越治古謂取士必先於素養詔大臣各舉其所知一新東觀之討論樂得英才而任使遺風不講幾數十世之相望引類並興以二十人而聞上一時名德之盛落落相高于今

侍從之華班班可數規模宏遠典故具存天祚真人日
熙庶績躋世于安寧之域作人以忠厚之風正臣進而
羣枉之道消德意孚而不肖之心化股肱一體既丕式
於老成諒直多聞將旁求于新進丁寧細札祖述舊章
使棲遲涵泳於圖書翰墨之林以滋長成就於英俊賢才
之藪蓋梗楠杞梓聳昂霄之幹珪璋琮璧抱韞櫜之珍
必藉良工親逢大匠然後薦丘壇以交神明之貺壯宮
室以除風雨之虞豈徒然哉所用如是如某者生而非

敏壯也無聞學淺鮮而不根氣姜蕤而易涸英華無幾
局韻太拘既未能赫赫以動人固不善盱眙而徇物以
牛捕鼠鈍不適時緣木求魚勞非得計碌碌衆人之役
遲遲行路之間幸從庠序之外官不廢絃歌之舊習家
有一鍾之石篋無三上之書乘雁雙鳬既不關於多少
大鵬斥鴳亦各適于逍遙何期近弼之誤知過以不才
而應詔徬徨捧檄蹢躅振衣為逢極治之朝庶達敢言之
志而舊文卑弱空驚賈誼之過秦來譽寂寥良愧陸機之

入洛家幾索米門寡曳裾待漏越期懷鉛就席感嘆紆
袍之故態顧瞻金馬之盛遊下筆不休乏傳毅屬文之
思令人忘倦非馬周論事之才雖拘攣綴拾以成編終
底滯迂踈而可笑畫地作餅何以療饑曝日獻君未爲
知術尚蒙採擷不即棄捐驅蹢躅于遼東竟無他異望
騰驤于冀北猶踵後塵是何異綴魚目於夜光補狐裘
以羔袖既乖準度有誤題評此蓋伏遇某官道德在
躬聞望超世契光華之盛旦見事業于有爲文章博洽

而不以窮人器質渾厚而樂於成物致茲末品亦預同
升所願讀書陽城猶喜於從吏未能成賦左思亦幸於
爲郎而况大君深切之訓詞近侍雍容之知遇實英俊
並游之會方朝廷有道之時戴日之老畢世而再逢窮
穴之士動心而竊嘆美意不輕於樂育終身敢薄於自
期固當深雪滯昏鏤磨頑魯黽勉平生之志激昂君子
之風不獨丹鉛點勘之爲工必使事業語言之可用老
將至矣寧自廢于聖時行或使之冀少伸其素志

試宏詞

謝試中宏詞啟

晁之道

仕或爲貧則自鬻蓋非獲已學當務本雖屢中豈足言
功得非所宜榮以爲懼竊以發天人之秘奧陳道數之
本原喻德意於四方寫英聲于萬世仰參造化之靈氣
是謂文章之極功所以窺雅頌之尊高則商周之道德
愈白誦訓誥之深博則文景之忠厚可知苟其氣質淺
陋而已卑則其事業湮泯而不顯蓋國實須士而治

必尚文此朝廷掄才之要津而宏詞設科之本意故畧其保任之法使時不崇乎造請之風而腆以推獎之方使人自竭其磨礱之力發于訓戒責相如視草之功播于聲詩求子雲奏賦之麗載述以考叙事之法表章以觀應用之才是所謂金馬玉堂之文豈容妄作未嘗窺石室柱史之藏安得尸功自非有妙當世之語言烏足以中有司之尺度如某者受才甚下涉道每踈早預賞延復塵科第廿十年之不調悵三釜之已違似是馬曹

恍復迷身於半世不探虎穴固知坎壈於窮途舊學浸
沉於塵埃豪氣遂移于憂患騏驎久餓誰爲落毛駑駘
既疲愈安伏櫪顧乏中人十家之產可營負郭二頃之
田仲寶祖孫未甘寂寞西華兄弟幾至凋零居有弗承
之羞敢怠必復之志攘九折之臂遂忘不武之慙戛三
咽之言寧免無文之誚豈期過聽俾效先鳴此蓋伏遇
某官協贊大中作新多士議論風采四方儀型教學陶
鈞一世宗匠方當崇起上臣事君之偉業故不忍遺曲

學泥古之空言借以輝光略其蕪累豈徒取其一日之
所試蓋將責以終身之所成某謹當不棄前脩更期來效
務求諸已敢不敬業以樂羣無溺于文庶幾力行而造
道

謝試中宏詞啟

趙承之

昨聞制科人自謂為握靈珠甫上奏封衆皆喜於得大
將敢意甚精之選遽收極陋之姿恩踰分以起羞聲過
情而知懼竊以文者貫道世實須才當無事以詳延屬

有求而備用今豈乏士人皆願忠故濟濟登朝穆若宗
周之化彬彬聚闕炳然皇漢之風率皆謹顓俊以旁招
務雋英而樂育課其牋奏用觀文吏之才究彼誓銘及
定大夫之位所以網羅邦彥追琢時髦嘉有非常之人
俾續無前之蹟國家奮炎開運執象膺圖昭七聖以垂
休亘千齡而敷化勝殘去殺戈倒載以垂囊偃革辭軒
車結旌而奉御奮乎百世之上躋于三代之隆上方泊
乎無爲綽然有裕廣文聲而雅志循堯道以儲精昭回

之光下飾于萬物旁礪之德上暢于九垓臨雍泮以恢
儒坐王公而論道賁爻爻之帛鳳使馳巖縶皎皎之駒
鶴書赴隴江飛之鳬蓋少冀羣之馬幾空猶復側席幽
人夢想賢士講興能之茂典復論秀之新規謂篆刻乃
童子之工而經術固大臣之事用專六藝博勸諸生鄒
魯彈冠讀詔書而歎息庠黌動色習矩步以委蛇然念
士寡全能才鈞定分德行政事稽聖黨以殊科文苑儒
林較史流而異傳慮風雅之或寢顧祿利之使然思數

路以兼收庶一隅之不廢肆求古制爰采唐科且比事
屬辭乃典章之故實而駢四儷六亦翰墨之彌文豈壯
夫而不爲固聖人之有取而況歌功頌德用有重于朝
廷馳檄飛書事或嚴于法律集諸難而求備該衆美以
取長雖投牒之且千來斯不拒而限員之以五中者幾
希屬當首選之辰茲謂才難之際命春官而始事詔宗
伯以程能顧待遇之特優宜校量之甚悉自匪文高繡
虎藻擅摛鸞金擲地以騰聲雖處囊而耀穎則何以青

錢萬選動居掌握之中黃鵠一飛起遙雲霄之上俯慙
竊吹仰玷精求伏念某絕壑鯁生翔蓬滯羽幼木強而
不慧長椎鈍以無奇李蔡下中素微于品目賈山涉獵
風病於空踈敢萌拾紫之懷分隔紆朱之願第以世蓄
油素家傳布韋堂克構以寧隳羶餘青而故在歲
不我與惜年往以難攀人莫已知懼時來之不再稍絕
編而自厲遂佔畢以忘勤須階任子之恩嘗隸奉祠之
役未濡鵜翼切悔于初心徒處鷄羣重增於懦氣因厲

決科之志妄馳干祿之情綴爾雅之蟲魚定非石砢落習
枚臯之賦頌頌類俳優亟殫下俚之文過忝英游之第學
慚為已食愧浮人千金屠龍藝既成而安用三年刻楮技
雖勞而可捐輒辭補掾之符歸奉循陔之養因磨礱於
事業獲馳騁于古今充棟汗牛嗟腐唇而莫釋濡翰燥
吻笑琢腎以何愁默蕭散以累年忽侵尋而再閏自安
鳩拙孰冀鶯遷豈圖遭會之優重際設科之始復強顏
而圖進深畫足以包羞鼯鼠何知不諱五窮之辱由基

甚慙更希百中之能森列棘以造廷駭據梧而褫氣洛
陽才子絢錦臚以飛英稷下先生搗錦心而揆藻爭背
城而借一各奮臂以當千驟見大巫舌橋然而莫下旁
窺巧匠思軋爾以如抽徒勉課於泛悠蓋僅成于骯髒
自懲藍縷敢觸於上聞苟逌詆訶詎期夫中選方念竄身
之計遽叨入等之崇禮重續貂遂兼收于犬尾上嫌吮
墨因強飾于蠅頭實非嘗試之間敢有庶幾之望再念
某少而聞禮壯乃爲箕佩悅承顏志方伸于戲綵賜金

祖道親俄屬于挂冠感負荷以惟艱懼責委之誠重迫
停車而畢試乃就駕以言歸怒焉肺腑之憂疾若炭來
之積雖第名之非首在塞望以良多戰勝則驕有愧卜商
之趣檄至而喜無慙毛義之心榮獨倍于衆人感固深
於平日此蓋伏遇某官權衡正道衣被詞人入聖域
以惟優任天下而益重洪鈞播物益充良祿之求巨冶
鑄金舉適方圓之用致容謏聞亦附羣英某敢不寤寐
前脩始終素履約枝言而務本探學海以窮深性也不

移竊慕古人之節時乎有用願酬國士之知

謝試中宏詞啟

方雲翼

楓宸射策舊聯郤桂之名蘭省奏篇復冒齊竽之列叨
榮過矣揣分歉然竊以取士雖本於辭章論人莫先於
器識臯朔以俳優自詆悔不通經王楊以眩瞶相矜類
難致遠攷片言于紙上得大槩於胸中惟純儒含潤色
之英聲諧韶濩而正士蘊懷冰之操句挾風霜何詞旨
之無瑕蓋淵源之有自施諸實用號曰通才觀歷朝選

任之規見今日揄揚之意法姑稽于紹聖建此一科事
茲重于中興逮今五舉彰華纓而接武粲大筆以爭輝
播告多方擅燕許絲綸之手形容盛德掩卿雲黼黻之
工善序者辨其華記事者提其要勒成功于砥柱草木
聞風述畫像于凌煙丹青動色陋袁郎之露布小虞人
之官箴暢皇靈于諭蜀之詞揚大義于出師之表試所
長于一日責其効于終身宜得異流以光前躅如某者
凡資不韻惜學無方究繁露於一經未識懷蛟之夢効

甘泉于四賦終慙吐鳳之材陪多士以造庭竊下科而
試吏念希驥之馬追十駕以何難而向晨之鷄肯一鳴
而遂已誓殫綿力勉習殊科人共笑其才疎已獨憐其
志拙焚膏繼晷親細字于短檠安步當車拚悲歌于長
鋏戍期未至卒業可營每虞類狗之羞復起雕蟲之悔泛
桃花之新浪尚認前津指楊葉之舊穿敢圖後矢非藉
噓枯之素曷收貫札之功此蓋伏遇某官受天鉅才爲
國隆棟主張儒道障百川而東之儀羽天朝見一鶚之

直上執經帷幄避寵樞機宸衷資借箸之謀士類倚持
衡之力致茲猥瑣亦預甄收某敢不仰附餘輝俯摩鈍
質雖夫子之牆數仞未得其門然魯國之士一人敢忘
其教

謝試中宏詞啟

石敏若

戰當孰勝羞提大敵之戈矛寸有所長不負生平之筆
墨色與寵變汗隨魂飛切評古今之偉觀蓋是乾坤之
英物瓊盃玉笋輝煌希世之榮觀陣馬風檣洒落驚人

之粹語峭心胸之山岳鑑咳唾之珠璣張膽揚眉寫成
和氣書牒點翰收入太平倘不爲縉紳望封禪書是必
作聖主得賢臣頌烜赫淮夷之雅鉤轟郊廟之歌此
李唐開博士之途雖韓愈有中書之黜獨當一面豈不
誠大丈夫連中八科真可謂奇男子故紹聖右文之際
使粉袍擲管而來風蕩而鳴虎角而翼填胸學海震百
川吞浪之聲破竹辭鋒森萬丈倚天之劍多多益善凜
凜大奇盡搜天下之英才不到孤生之名姓某者羈酸

牢落勃窣盤跚窺豹一斑戰蝸兩角頑顏鈍頰有窮鄉
冰雪之容濁胃枯腸無春草池塘之夢綠蕪安在黃卷
相憐漫彎楊葉之弧低躍桃花之浪謂薰酣文史者不
可奪其志而沉迷丹墨者異乎吾所聞三復斯言名教
之中自有樂一行作吏州縣之職徒勞人歸棲得助之
江山再托可親之燈火浩歎傷弓之鳥動輒驚弦其如
食槿之蟲未能忘苦比趨文陣強廁俊遊鼯鼠五技而
窮鉛刀一割而鈍雖臨卽之詞客欲飄飄然奈江左之

將軍但平平爾望不及此得之若驚此蓋伏遇某官
有猷有爲可愕可駭氣撼八極此必神仙中人心雄萬
夫自是風塵表物特挈互鄉之童子收爲吏部之門生
某敢不增益所不能敬脩其可願輒馳窘步望毫釐尺
寸之功名誓覽遺編老三萬六千之日月

謝試中宏詞啟

蘓子瞻

臨軒策士方搜絕異之才隨問獻言誤占久虛之等忽
從佐縣擢與評刑內自省於無堪凜不知其所措恭惟

至治之要惟有取人之難用法者畏有司之不公故
舍其生平而論其一日通變者恐人才之未盡故詳于
採聽而畧于臨時此二者之相形顧兩全而未得一之
于考試而掩之于倉卒所以爲無私也然而才行之迹
無由而深知委之于察舉而要之於久長所以爲無失
也然而請屬之風或因而滋長此隋唐進士之所以爲
有弊魏晉中正之所以爲多奸惟是賢良茂異之科兼
用考試察舉之法每中年輒下明詔使兩制各舉所聞

在家者能孝而恭在官者能廉而謹臨之以患難而能不變邀之以寵利而能不回既已得其行已之大方然後責其當世之要用學博者又須守約而後取文麗者或以用寡而見尤特於萬人之中求其百全之美凡與中書之名命已爲天下之選人而又有不可測知之論以觀其默識之能無所不問之策以效其博通之實至於此而不去則其人已可知然猶使御史得以求其疵諫官得以考其素一陷清議輒爲廢人是以始由察舉而

無請謁公行之私終用考試而無倉卒不審之患蓋其
取人也如此之密則夫不肖者安得而容某才不逮人
少而自信治經獨傳于家學爲文不願于世知特以饑
寒之憂出求斗升之祿不謂諸公之過聽使與羣豪而
並遊始不自量欲行其志遂竊俊良之舉不知氣力之
微論事迂濶而不能動人讀書踈畧而無以應敵取之
甚愧得而益慙此蓋伏遇某官德爲世之人望位爲
時之顯官聲稱所被四方莫不奔趨議論一加多士以

爲進退致茲庸末亦與甄收然而志卑處高德薄寵厚
歷觀前輩由此爲致君之資敢以微軀自今爲許國之
始過此以往未知所裁

謝試中宏詞啟

孫仲益

列棘程書自愧北方之學乘槎問漢仰窺東壁之光被
寵若驚過情而懼竊以堯舜文王爲正道萬物所共由
詩書執禮皆雅言衆人固不識篤生先覺丕闡斯文用
爽厥師同歸于治洋洋關雎之亂敷聞廣樂之音渾渾

虞夏之書大破專門之學黎民於變比屋可封學圃學農
盡棄小人之事逃楊逃墨一歸君子之儒希顏之人者
亦顏之徒誦堯之言者行堯之行歷觀上世育材之盛
未有今日得士之多自非粲然有文孰能出乎其類如
某者樸櫟不足數瓠落無所容智昧通時豈栖栖而爲佞
學知是古但斷斷以無他方大道之顯行偕羣英而樂
育薄采泮宮之芹藻備嘗太學之藿鹽屈首一經屢鼓
齊門之瑟折腰五斗遂彈秦地之冠坐席未溫茹荼邁

愍祥琴在御新穀再升念將母之不遑欲懷安而未可
聊作代耕之養敢形干澤之心會公車之興忙揭詞科
而試藝方奉三無私之世實稽五不諱之誅率爾而行
雖萬人吾往矣卒然而問叩兩端而竭焉寸陰不留長
技盡廢周庭合雅曹鄣之什無譏魯史成書游夏之辭
莫措豈謂曲成之賜不遺千慮之愚揚糝在前積薪居
上四頒詔綍褒進書林秉太乙之青藜對古人之黃卷
拂蟬辨蠹初無從事之勞毀瓦畫墁真愧食功之意叨

欽定四庫全書

五百家播芳大全文粹
卷三十六

蒙若此報稱謂何此蓋伏遇某官斯道覺民嘉謀告后
德業萬夫之望文章百世之師至大至剛雖有回天之
力多材多藝已聞賁弼之祥欣逢君子長育人材之時
復無大臣遺忘微賤之歎致茲庸妄亦預甄升德大
難酬人微曷稱懷鉛抱槧已參蓬萊藏室之遊檢玉泥
金或議泰山梁父之事誓殫微效用答鴻私

五百家播芳大全文粹卷三十六